

Te whaitake o te Tauira Whakahaere ki ngā Ākonga Māori

Nau mai

KKei a tātou o tēnei whakatipuranga te wā kia pohewa, kia waihanga i tētahi pūnaha kairangi rawa, pūnaha ahumahinga, ringarehe hoki mō Aotearoa ka noho ai ko te ākonga te pūtake.

'Whakairohia he toki, tāraia te anamata', koia tēnei ko te whakatauākī a Te Pūkenga e kapi ana i tōna tirohanga whānui.

Mā tēnei whakatauākī anō tātou e whakatītina i a tātou kia mahitahi, kia hoe tahi mō te painga o ā tatou ākonga. Ka uru mai hoki ko ō tatou hoa Tiriti o Waitangi (ngā iwi me ngā hapū o Aotearoa), ā tātou kaimahi kōtuinga huri noa te motu, ā tātou kaitukumahi me ngā hapori.

Kia kotahi mai tātou, ka whai painga ā tātou ākonga kia whai mahi pai ināianei, ā, hei ngā rā kei te heke mai. E taea ai e tātou, e tuari pārongo ana mātou mō te huarahi hei whai mā tātou kia mātua whiwhi ā tātou ākonga i ngā hua pai rawa hei ngā rā ki tua.

He aha ai? Ko koutou te aronga matua, ko ngā ākonga te pūtake o ā mātou whakaaro, mahi whakahere hoki.

Tuatahi ake, me tika te whakatū i ngā pou pou o tō tātou whare, arā, ko te waihanga 'Tauira Whakahaere' mō Te Pūkenga. Koia ko te pou tarāwaho, hei whakaahua i ngā mahi a Te Pūkenga hei ngā rā ki tua.

Ko tāna hoki he whakaahua i ngā wheako anamata o ngā ākonga, kaitukumahi, kaimahi, me ngā iwi, hapū me ngāi Māori, me pēhea hoki tātou e kōkiri i te mana ōrite, inā koa mō ngāi Māori, ngāi Pasifika me ngā ākonga whaikaha.

Kua haere mai mātou ki a koutou ki te whakamārama i te Tauira Whakahaere, ki te kohi hoki i ō koutou whakaaro.

E tika ana kia mōhio mai koutou ko tēnei te hīkoinga tuatahi o tā tātaou haerenga whakaumu, me te aha, kāore tā mātou Tauira Whakahaere e whakaū ana i te hoanga o te whakahaere me tōna hanganga, ngā tikanga kaitiakitanga, me ngā rohe.

Hei te mutunga o te tau nei, hei tērā tau anō ka hoki mai mātou ki te rapu anō i ō koutou whakaaro i runga i ngā mahi hoahoa i te hanganga o Te Pūkenga.

Hei whakamārama Description of our whakatauākī

Ko te toki te taputapu tino taonga rawa o te ao Māori. Whakamahia ai tēnei taonga hei tārai waka, hei hanga whare, hei tua i te rākau, hei hanga taputapu anō. Inā ke ngā whakataukī huhua mō te whakamahia o tēnei tino taonga, tae atu ki te tangata tino matatau ki tētahi mahi, i kīia ai 'he toki'.

Hāngai tonu te whakaaro mō te toki ki te ingoa nei a Te Pūkenga, koia anō tētahi kupu mō te tangata matatau, tautōhito rānei ki tētahi mahi. Ko te kupu 'whakairohia' hei whakaweawe i te tangata ki te whakapiki i ōna pūkenga, te whakangungu rānei i a ia ki tētahi taputapu. Ko te wāhanga tuarua o te kīanga e kōrero ana mō te āpōpō. Ko te tikanga o te kupu tārai he waihanga, he ahua, he hanga rānei i tētahi mea, ā, ko anamata he kupu anō mō ngā rā ki tua, te āpōpō rānei. Nā reira, he kōrero tēnei hei whakaaweawe i te tangata kia whai kia pūkengatia hei āwhina i a tātou katoa ki te waihanga i te ao o āpōpō.

Tukua mai ōu whakaaro mā te

Toro atu: yourvoice.tepukenga.ac.nz

Īmēra: yourvoice@tepukenga.ac.nz

E wātea mai ana te Tauira Whakahaere i tepukenga.ac.nz/opmodel

Tuwhera ai tēnei whaitanga atu i 18 October to 8 November.

Tiro wawe: He aha tōna whaitake ki a koe?

- Mā tō wheako e mātua whakarite he huarahi oranga tauwhānui e hāngai ki ō wawata me ō hiahia
- Te ōrite o te whai wāhi, ngā huarahi me ngā otinga ka noho tōmua rawa ina tirohia ana tō haerenga ako, ara mahi hoki.
- Ka mātua aronui ngā kaimahi ki a koe hei Māori kia tika te tautoko i a koe
- Ka tautoko mātou i a koe kia hono ai tō haerenga ako me tō whānau, hapori, hapū, iwi hoki.
- Ka tautoko mātou i a koe i runga i te mātauranga, tikanga me te ahurea Māori i roto i ō whakaakoranga, ratonga tautoko, me te whakanui i a koe e angitu ana, e pāhekoheko ana ki ngā kaimahi me ngā kaitukumahi.
- Mā ō kōrero me ōu whakaaro mātou e ārahi kia hāpai i te whakahaere patu kaikiri, haumaruru hoki.
- Ka whai hua koe i ngā taiao auaha, tuwhera mōu hei ākongā Māori, he mea waihanga tahi i runga i ngā hononga me Te Tiriti o Waitangi (ngā hapū me ngā iwi o Aotearoa)

Ōna taipitopito: He aha tōna whaitake ki a koe?

Te oranga tauwhānui o ngā ākongā

"Ko te kaha o te ao Māori kei te kaha o ngā hononga, ā, e kore tēnei āhua e ngaro - He tino taonga tērā ki au."

I rongo mātou ina tīmata ana ētahi ākongā Māori e mauri rere ana ngā kare-ā-roto, ka apurua, ka māharahara hoki. Tērā e rangirua koe, te mahara anō mēnā ka tau pai koe ki tēnei taio ako hou.

Ko ētahi i kōrero mō te whakamā inā ka whakamōhio i ngā kaiako tē taea ētahi o ngā karāehe nātemea e haere ana koe ki tētahi tangihanga, inā hoki e kore rawa ngā kaiako e mārama.

E mārama ana mātou ki ngā huarahi me ngā wero ki a koe i runga i tō haerenga ako. Mā tā mātou huarahi oranga tauwhānui e hono ai mātou me koe kia mārama ai ki ō wawata me ō hiahia, me te waihanga i ō mātou ratonga, taiao hoki kia ea ai aua hiahia.

E ngākaunui ana a Te Pūkenga kia tuia Te Tiriti o Waitangi me te mātauranga Māori ki te kōtuinga, puta noa. Ka noho te māramatanga ahurea hei āheinga e tino hiahiatia ana mō ā mātou kaimahi katoa. Ka manaakitia tō mātauranga me ō tikanga Māori, ā, ka hāpaitia i roto i ō akoranga. E mōhio ana mātou he mea whaitake tēnei kia whai oranga ngākau, hinengaro hoki i runga i tō haerenga ako.

Kia angitu koe, ka angitu anō tō whānau, tō hapori, tō hapū, tō iwi hoki. Mā te oranga tauwhānui e tūhono ai aua tāngata ki a koe me tō haerenga ako, ka kitea hoki rātou hei pou toko ki tō angitu.

He mea pūmau ngā tikanga me ngā mātāpono Māori ki tō haerenga ako

I kī mai koutou ko te angitu ki a koe ko tērā o te whai pūkenga kia whai koha koe ki tō whānau, hapori, hapū me tō iwi.

Mō ētahi o koutou kāore e hāngai ō akoranga ki ngā ao Māori nātemea kāore kau he tirohanga Māori i tō kura, tō ahumahi rānei, kāore hoki he aronga ki Te Tiriti o Waitangi. Kāore hoki koe i whai tautoko hei uri Māori. E ngākaunui ana a Te Pūkenga kia whakaata i tō ahurea Māori i te roanga i tō haerenga ako. Nā konei ka kitea te mātauranga, ngā tikanga me ngā kaupapa Māori i roto i ō whakaakoranga me ngā ratonga tautoko, ngā kaupapa hei whakanui i tō angitu me ō nohotahitanga ki ngā kaimahi me ngā kaitukumahi.

Mā tō mātou whakahaere e tiaki i te reo Māori, te mātauranga Māori me ngā tikanga Māori, ka mutu ka mātua whai kia tika te whakarato hei whakamana, hei tuatoko hoki i aua āhuetanga. Ka aro mātou, ā, ka tuku huarahi e tika ana kia tutuki rawa ō hiahia. Mā Te Pae Tawhiti, tā mātou anga hiranga Tiriti o Waitangi e ārahi ā mātou mahi tara-ā-whare kia tutuki rā anō i te hiranga me te mana ōrite mō te Māori. Mā tō reo mātou e āwhina ki te whakarite i ngā taiao tika kia angitu ai koe, ki te ārahi hoki i ngā whakapainga ake.

He pūnaha, he hanganga hoki hei whakamana i te Māori

Ko ētahi tāngata i ngana kia hoki ki te ako i kī mai i uru tika atu rātou me te kore mōhio ki ngā mea matua, pērā i te wātaka. He mea whakamā te pātai ki ētahi atu. Nā te nui hoki o ngā kōrero i uaua te mahi.

I kī mai koutou kei te hiahia koutou i tētahi wāhi Māori tonu te hanga, Māori anō te āhua. I kī mai ētahi ko te hiahia kia tokomaha ake ngā tāngata e hīkoi tahi ana me te iwi, ki te para huarahi pai ake mō te Māori.

Me whai hurihanga nui a Te Pūkenga hei whakaumu i tā mātou whakahaere. Mā tēnei hoanga e turaki ngā taupā ā-pūnaha ka heipu mai, pērā i te kaikiri me ritaha i roto i ō wāhi ako. E mōhio ana mātou ki ngā pōraruraru ka pā mai i ā mātou pūnaha, pērā i ngā tukanga whakauru, aromatawai hoki, ka mutu he taupā anō ērā ki te angitu. Ka tautokohia tā mātou whakahaere hou e ngā pūnaha tika, pūnaha haumaruru, ā, ka riro mā tō reo anō mātou e ārahi ki te whakarite i ngā pūnaha me ngā hanganga hei hāpai i te whakahaere whakamana tangata, kaupare atu i kaikiri, he whakahaere hoki e whakahī ai koe.

I ō mātou mahi katoa, ka whakaatu mātou i te ngākaunui ki te whakamana i Te Tiriti o Waitangi me ngā mātāpono e here nei i te hononga i waenga i te kāwanatanga me te Māori. Hei tūāpapa hoki Te Tiriti o Waitangi me te mana ōrite mō tā mātou whakahaere, ā, koia hei ārahi i a mātou ki te whakarite taiao manaaki, haumaruru, auaha, tuwhera hoki mōu hei ākongā Māori.

Tukua mai ōu whakaaro

Kei te hiahia mātou kia rongō mai ōu whakaaro. Ko ā mātou tino pātai kei raro nei, heoi, kei te hiahia tonu kia rongō kōrero mai i a koe mō ngā take nui ki a koe e pā ana ki te Tauira Whakahaere, ahakoa te aha. Tukua ōu whakaaro ki: yourvoice.tepukenga.ac.nz

Ngā pātai

Mā te tuku mai i ō whakaaro mō ngā pātai i raro nei mātou e āwhina ki te whakaoti i Tauira Whakahaere ka tukua ki te Minita Mātauranga kia whakaaetia ā te marama o Tihema o tēnei tau.

Kōtuinga ako

Ko ngā kōtuinga ako he kōtuinga tīma ōkawa ka huitahi ki te whakamahi i ō rātou mātauranga, pūkenga, āheinga hoki i te tautoko i te tukunga o te mātauranga ahumahinga, ringarehe, me ngā kaupapa paetahi, tāura hoki.

- He whakaaro rānei ōu mō ngā kōtuinga ako e kōrerotia ana i konei?
- Ki ō whakaaro he pēhea ngā kōtuinga ako e whakarite ai i Te Pūkenga kia pai ake tōna tuku ki ngā ākongā me ngā kaitukumahi?
- He aha pea ngā tino wero mā mātou hei pare atu?

Te whakarōpū i ngā mahi

I te Tauira Whakahaere, kua whakarōpūhia ngā mahi ki ngā ara e rua hei whakaahua mēnā he mahi 'kōtuinga punga tahi' he mahi 'tukunga tohatoha' rānei.

Ko tā te kōtuinga punga tahi he whai kia ōrite tonu, kia tika te utu, kia whānui hoki te kounga. Ko ngā mahi tukunga tohatoha ka rite kia tata ki te wāhi e tukua ai te ratonga, kia urupare ki ngā ākongā, ō rātaou whānau, ngā kaitukumahi me ngā matea ā-rohe.

education is delivered in Aotearoa New Zealand.

- He kōrero rānei āu mō te āhua o tā mātou whakarōpū i ngā mahi hei mahi kōtuinga punga tahi, mahi tukunga tohatoha rānei?

Te whakamana i Te Tiriti o Waitangi

Me mātua whakaata e te Tauira Whakahaere ngā hononga Māori-Karauna e whakamana ai i Te Tiriti o Waitangi i roto i te kaitikitanga, ngā whakahaere, te whakanui hoki i ngā kaiārahi Māori i roto i ngā kaupapa whanaketanga ā-rohe, te tutuki hoki i ngā otinga ōrite mō ngā ākongā Māori me ō ratou whānau, ā, he mea taketake anō tēnei ki ā mātou tikanga mahi e tutuki ai te mana ōrite i waenga i ngā iwi.

- Āe rānei e rite ana tā mātou Tauira Whakahaere kia tutuki i a ia ēnei hiahia?
- Ki ō whakaaro, he mahi atu anō hei whai mā mātou? (hei kaiako pea, hei kaitukumahi, hei ākongā rānei)?

Mana ōrite i waenga i ngā iwi mō ngā huarahi me ngā otinga

Me mātua whakaata e te Tauira Whakahaere he mātāpono matua te mana ōrite me te whai wāhitanga o tā mātou whakahaere. Māna e taea ai tātou te ahu whakamua, kia whai mana ōrite mō ā tātou ākongā me ngā whānau, me ngā kaimahi - mō ngā huarahi me ngā otinga.

- Āe rānei e rite ana tā mātou Tauira Whakahaere kia tutuki i a ia ēnei hiahia?
- Ki ō whakaaro, he mahi atu anō hei whai mā mātou? (hei kaiako pea, hei kaitukumahi, hei ākongā rānei)?

Te urupare ki ROVE

E whakatakoto ana tō mātou Tauira Whakahaere i tā mātou e mahi ai, e pēhea mātou e whakahaeretia ai hei whakatinana i tā mātou tirohanga roa me ngā whāinga o te Whakahouanga o te Mātauranga Ahumahinga (RoVE).

- Kei te kite koe i tētahi āhuatanga hei panoni kia whakatinana i te tauira ngā whāinga o te whakakouanga o RoVE?

Te Mahitahi ā-Rohe

E whakatakoto ana tō mātou Tauira Whakahaere i te whakaaro nui kia mahitahi i roto i ngā rohe me ētahi hoa ā-rohe, ā-hapori hoki (pērā i ngā Rōpū Arataki Pūkenga ā-Rohe, te Manatū Whakahiato Ora, a Hīkina Whakatutuki, ng`akura me ngā whakahaere ā-rohe)

- He aha ngā huarahi e tuwhera ana mō ā mātou ākongā, kaitukumahi me āu ake mahi hei whakarite kia mahitahi me ngā hoa ā-rohe?

He kōrero whānui mō te Tauira Whakahaere

- He kōrero anō āu mō tō mātou Tauira Whakahaere?

He kōrero whānui mō Te Pūkenga

- He kōrero anō āu mō Te Pūkenga me te huarahi kei whāia e mātou?